

საქართველოს ახალგაზრდა იურისტთა ასოციაცია GEORGIAN YOUNG LAWYERS' ASSOCIATION



საიამ ადმინისტრაციულ სამართალდარღვევათა კოდექსში შესატან ცვლილებებთან დაკავშირებით პარლამენტს დასკვნა წარუდგინა

საქართველოს პარლამენტი განიხილავს საქართველოს ადმინისტრაციულ სამართალდარღვევათა კოდექსში ცვლილებების შეტანის შესახებ კანონპროექტს. საიამ ამ კანონპროექტის ორ მუხლთან დაკავშირებით წარადგინა თავისი წერილობითი მოსაზრება.

პირველი ნორმა, რასაც საიას დასკვნა ეხება, არის სამართალდარღვევათა კოდექსის 171-

ე მუხლი. ეს ნორმა ჯერ კიდევ საბჭოთა პერიოდიდან ადგენდა ადმინისტრაციულ პასუხისმგებლობას საზოგადოებრივი თავშეყრის ადგილებში მთვრალ, ადამიანის ღირსებისა და საზოგადოებრივი ზნეობის შეურაცხმყოფ მდგომარეობაში ყოფნისათვის. პარლამენტში განსახილველ კანონპროექტში სიტყვა „მთვრალი“ ამოღებულია და დარჩენილია ადამიანის ღირსებისა და საზოგადოებრივი ზნეობის შეურაცხმყოფ მდგომარეობაში ყოფნა. საიას მიაჩნია, რომ როგორც 1984 წლის რედაქცია, ასევე ის კანონპროექტი, რასაც პარლამენტი განიხილავს, ბუნდოვანია და ეწინააღმდეგება სამართლებრივი სახელმწიფოს პრინციპს, სადაც კანონი უნდა იძლეოდეს ნათელ, განჭვრეტად პასუხს იმაზე, თუ რა ქმედება არის აკრძალული ან ნებადართული. 171-ე მუხლის როგორც არსებული, ასევე შემოთავაზებული რედაქცია მსგავს პასუხს არ იძლევა. ეს ნორმა საკმაოდ დიდ თავისუფლებას აძლევს სამართალდამცავ ორგანოებს, თავად გადაწყვიტონ, რა ქმედება ითვლება ამორალურად და ამის საფუძველზე იძულებითი ღონისძიებები გამოიყენონ პირის მიმართ. იმ ვითარებაში, როდესაც მოქალაქეებზე შეურაცხმყოფელი გადაკიდება, ლანძღვა-გინება და სხვა მსგავსი ქმედებები ისედაც წარმოადგენს სამართალდარღვევას, კანონში ბუნდოვანი ჩანაწერების დატოვება არ იქნება გამართლებული ქმედება.

საიას მეორე შენიშვნა ეხება ადმინისტრაციულ სამართალდარღვევათა კოდექსის 173-ე მუხლს. კანონპროექტის ავტორები ნორმის დისპოზიციამში ამატებენ სიტყვებს: „სამართალდამცავი ორგანოების მიმართ სიტყვიერი შეურაცხყოფისა და მათ მიმართ შეურაცხმყოფელი ქმედების განხორციელება (გარდა სიტყვიერი შეურაცხყოფისა)“. ასევე ამ ქმედებისათვის სანქციის ოდენობა იზრდება 500-დან 2000 ლარამდე.

2004 წლიდან 173-ე მუხლი გამოიყენება შევრებებისა და გამოხატვის თავისუფლების შეზღუდვის „კარგ“ საშუალებად, რასაც, ძირითადად, საპროტესტო, აქციებზე გამოსული პირების წინააღმდეგ „წარმატებით“ იყენებდნენ სამართალდამცავი ორგანოების წარმომადგენლები. უდავოა, რომ დაცვის ეფექტური საპროცესო საშუალებები ადმინისტრაციულ სამართალდარღვევათა კოდექსში არ არსებობს. მაშინ, როდესაც ვერც კანონმდებლობა და ვერც სასამართლო პრაქტიკა ვერ უზრუნველყოფს სამართლიანი სასამართლო განხილვის უფლების დაცვას ადმინისტრაციული სამართალდარღვევათა საქმეების წარმოების დროს, საია კატეგორიულად ეწინააღმდეგება ადმინისტრაციულ სამართალდარღვევათა კოდექსის ნებისმიერ მუხლში შეტანილი იქნას პასუხისმგებლობის დამდგენი ან დამამძიმებელი შინაარსის მქონე რაიმე სახის ცვლილება.

ამგვარად, საია მოუწოდებს საქართველოს პარლამენტს, სასკ-ის 171-ე მუხლიდან ამოიღოს სიტყვები: „ადამიანის ღირსების და საზოგადოებრივი ზნეობის შეურაცხმყოფელ მდგომარეობაში ყოფნა“, ასევე არ შეცვალოს 173-ე მუხლის შინაარსი და

საქართველოს ახალგაზრდა იურისტთა ასოციაცია GEORGIAN YOUNG LAWYERS' ASSOCIATION



სამართალდამცავი ორგანოს მოთხოვნისადმი დაუმორჩილებლობისათვის ჯარიმა არ გაზარდოს 500-დან 2000 ლარამდე.